

09 AUG 2002

Timor-Lawatan/I

PERDANA MENTERI TIMOR LOROSAE LAWAT MALAYSIA

KUALA LUMPUR, 9 Ogos (Bernama) -- Perdana Menteri Timor Lorosae, Mari Bim Amude Alkatiri akan melakukan lawatan lima hari ke Malaysia mulai Ahad ini.

Alkatiri yang mengetuai satu delegasi 41 anggota, dijadual mengadakan perbincangan dua hala dan perdagangan dengan Perdana Menteri Datuk Seri Dr Mahathir Mohamad pada Isnin.

Wisma Putra dalam satu kenyataan hari ini berkata Alkatiri juga dijadual memberi ceramah mengenai pembangunan ekonomi dan peluang-peluang pelaburan di Timor Lorosae pada jamuan perniagaan anjuran Dewan Perniagaan dan Industri Kebangsaan pada Selasa.

Alkatiri juga akan mengadap Seri Paduka Baginda Yang di-Pertuan Agong Tuanku Syed Sirajuddin Syed Putra Jamalullail.

Beliau akan diiringi Menteri Kanan Hal Ehwal Luar Jose Ramos Horta, Menteri Kewangan dan Perancangan Drs Maria Madalena Baovida dan ahli-ahli perniagaan.

Jose Ramos Horta juga akan memberi ceramah di Institut Diplomasi dan Hubungan Luar Negeri mengenai dasar luar Timor Lorose yang sebelum ini dikenali sebagai Timur Timor.

Perdana Menteri itu juga dijadual melawat Unit Perancang Ekonomi di Jabatan Perdana Menteri untuk mendengar taklimat mengenai program dan dasar pembangunan Malaysia.

Beliau juga akan diberi taklimat mengenai pembangunan dan pengurusan industri minyak dan gas nasional, PETRONAS.

-- BERNAMA

LIB ZS LAT